

三  
國  
志  
旁  
證

三國志旁證卷八

閩長樂梁章鉅撰

董卓傳 卓爲軍司馬從中郎將張奐征并州有功拜郎中賜縑九千卓悉以分與吏士

後漢書董卓傳從張奐擊漢陽叛羌破之拜郎中又張奐傳奐少立志節董卓慕之使其兄遺縑百匹奐惡卓爲人絕而不受按漢陽在涼州此云并州恐誤

韓遂等起涼州復爲中郎將西拒遂於望垣硤北爲羌胡數萬人所圍

潘眉曰西拒遂句絕時張溫別使卓討先零羌於望垣硤北爲羌胡所圍韓遂自在榆中非拒遂於望垣硤者也榆中屬金城郡望垣屬漢陽郡

注靈帝紀曰中平五年徵卓爲少府勅以營吏士屬左將軍皇甫嵩詣行在所卓上言涼州擾亂鯨鯢未滅此臣奮發効命之秋吏士踴躍戀思念報各遮臣車辭聲懇惻未得卽路也輒且行前將軍事盡心慰卹効力行陣六年以卓爲并州牧又勅以吏兵屬皇甫嵩卓復上言臣掌戎十年士卒大小相狎彌久戀臣畜養之恩樂爲國家奮一旦之命乞將之州効力邊陲

侯康曰後漢書中平六年徵卓爲少府不肯就上書言所將湟中義從及秦胡兵皆詣臣曰牢直不畢稟賜斷絕妻子饑凍牽挽臣車使不得行羌胡敝腸狗態臣不能禁止輒將順安慰增異復上其言跋扈與此獻帝紀絕殊又范書以徵卓爲少府及拜并州牧同在六年此則徵少府先一年亦小有參差也

注潰癰雖痛勝於養肉

潘眉曰後漢書作潰癰雖痛勝於內食內食猶言內陷是也  
中常侍段珪等劫帝走小平津

後漢書本傳注引山陽公載記段字作殷靈帝紀注小平津  
在今鞏縣西北

注

英雄記曰河南中部掾閔貢扶帝及陳留王上至雒舍止

靈帝紀注引獻帝春秋曰河南中部掾閔貢見天子出率騎  
追之北到河上天子饑渴貢宰羊進之厲聲責讓等曰君以  
閭宦之隸刀鋸之殘越從洿泥扶侍日月賣弄國恩階賤爲  
貴劫迫帝王假息漏刻游魂河津自亡新以來姦臣賊子未  
有如君者今不速死吾射殺汝讓等惶怖叉手再拜叩頭向  
天子辭曰臣等死陛下自愛遂投河而死 顧祖禹曰雒舍

在邙山之北驛舍也

時進弟車騎將軍苗爲進衆所殺

注

共攻殺苗於朱爵闕下

潘眉曰古今注承平二年十一月初作北宮朱爵南司馬門百官志北宮朱爵司馬主南掖門漢官典職云偃師去洛四十五里望朱爵闕其上鬱然與天連朱爵闕北宮之南門也時袁術與吳匡燒南宮九龍門欲脅出張讓等讓等將太后天子及陳留王從複道走北宮何苗袁紹屯北宮朱爵闕下吳匡等遂引兵攻殺苗於闕下

注

又收苗母舞陽君殺之棄尸於苑枳落中不復收斂

按上文言殺苗於闕下此言棄苗母之尸明是兩事而後漢書何進傳言吳匡等攻殺苗棄其屍於苑中蓋范史誤合之初卓信任尙書周毖城門校尉伍瓊等用其所舉韓馥劉岱孔

仙張資張邈等出宰州郡而馥等至官皆合兵將以討卓卓聞之以爲眚瓊等通情賣已皆斬之

錢大昭曰張資范書卓傳吳志孫堅傳並作張咨

注英雄記曰眚字仲遠武威人瓊字德瑜汝南人謝承後漢書曰伍孚字德瑜少有大節爲郡門下書佐其本邑長有罪太守使孚出教勅曹下督郵收之孚不肯受教伏地仰諫曰君雖不君臣不可不臣明府奈何令孚受教勅外收本邑長乎乞更授他吏太守奇而聽之後大將軍何進辟爲東曹屬稍遷侍中河南尹越騎校尉董卓作亂百僚震慄孚著小鎧於朝服裏挾佩刀見卓欲伺便刺殺之語闕辭去卓送至閤中孚因出刀刺之卓多方退却不中卽收孚卓曰卿欲反耶孚大言曰汝非吾君吾非汝臣何反之有汝亂國篡主罪盈惡大今是吾死日故來

誅姦賊耳恨不車裂汝於市朝以謝天下遂殺孚謝承記孚字及本郡則與瓊同而致死事乃與孚異也不知孚爲瓊之別名爲別有伍孚也蓋未詳之

陳景雲曰城門校尉伍瓊被殺在關東義兵初起卓未西遷之前而荀攸傳載卓徙都後攸與越騎校尉伍瓊等同謀刺董事隨就而覺則當時自有兩伍瓊謝承所記乃與荀攸同謀刺卓之人故稱孚官與志合其言孚爲瓊之別名者近之當時二人而名字並同者有二劉岱皆字公山是也

注  
華嶠漢書曰

隋書經籍志後漢書十七卷本九十七卷今殘缺晉少府卿

華嶠撰

又邊章韓約有書來欲令朝廷必徙都

潘眉曰邊章卽邊允韓約卽韓遂獻帝春秋云隴西以愛憎  
露布冠韓約邊允名以爲賊州購約允各千戶侯約允被購  
約改爲遂允改爲章

卓至西京爲太師號曰尙父乘青蓋金華車

潘眉曰漢制三公之上惟有大傅爲上公無太師應劭漢官  
儀曰太師古官也平帝元年孔光以太傅見授詔太師無朝  
十日一賜餐賜靈壽杖省中施坐置几太師入省中用杖自  
是而闕至卓自尊爲太師位在太傅上 虞荔鼎錄云董卓  
爲太師鑄一鼎其文曰太師古隸書

注京師地震卓又問邕邕對曰地動陰盛大臣踰制之所致也  
公乘青蓋車遠近以爲非宜卓從之更乘金華皂蓋車也

太平御覽卷八百八十引獻帝春秋云初平二年地震董卓



問蔡邕邕曰天爲陽故轉運於上地爲陰故安靖於下震是失其性以陰而爲陽也明公車不當青蓋宜改之以應變卓改爲綠蓋

注孫女名白時尙未笄封爲渭陽君

太平御覽卷三百五十六引卓別傳云卓孫年七歲愛以爲己子爲作小鎧冑使騎馱馬與玉甲一具慎出入以爲麟駒鳳雛至殺人之子如蚤虱耳

招呼三臺尙書以下自詣卓府啟事

潘眉曰應劭漢官儀尙書爲中臺御史爲憲臺謁者爲外臺是謂三臺

注卓爲太師嵩爲御史中丞拜於車下卓問嵩義眞服未乎又張璠漢紀曰卓抵其手謂皇甫嵩曰義眞怖未乎

後漢書本傳怖作構構古服字

築郿塢高與長安城埒積穀爲三十年儲

林暢園師曰據後漢書注郿塢舊基高一丈周迴一里一百步按三輔黃圖言長安城高三丈五尺若郿塢高一丈則不能與長安城埒蓋章懷太子所見明云舊基非必卓時之丈尺如是也 潘眉曰范史云高厚七丈號萬歲塢高三丈五尺厚亦三丈五尺故曰高厚七丈也

卓豫施帳幔飲誘降北地反者數百人於坐中先斷其舌或斬手足或鑿眼

杭世駿曰卓別傳云卓會公卿召諸降賊責曰何不鑿眼應聲眼皆落地

悉椎破銅人鐘簴及壞五銖錢更鑄爲小錢

太平御覽卷七百十二引三輔故事云卓壞銅人十枚爲小錢熨斗又洛陽伽藍記云修梵寺北有永和里董卓之宅也里南北皆有池卓之所造水冬夏不竭里中邢鸞家常掘丹砂數十萬銘云董卓師之物後卓夜中隨鸞索此物鸞不與之經年鸞卒

司徒王允尙書僕射士孫瑞卓將呂布共謀誅卓是時天子有疾新愈大會未央殿布使同郡騎都尉李肅等將親兵十餘人僞著衛士服守掖門布懷詔書卓至肅等格卓卓驚呼布所在布曰有詔遂殺卓夷三族主簿田景前趨卓尸布又殺之凡所殺三人餘莫敢動

後漢書本傳田景作田儀注云九州春秋儀字作景又引九州春秋云布使秦誼陳衛李黑等僞作宮門衛士持長戟卓

到宮門黑等以長戟俠义卓車或义其馬卓驚呼布布素施  
鎧甲於衣中持矛應聲刺卓隊於車 杭世駿曰董卓之死  
在獻帝初平三年操未秉政三國未分謝承華嶠司馬彪袁  
山松之徒撰後漢書皆爲立傳陳壽乃闕入魏志何也劉知  
幾云漢之有董卓猶秦之有趙高昔車令之誅旣不列漢史  
何太師之斃獨刊魏書或曰魏志之首傳董卓明禍首也倘  
亦西漢世家項籍之意乎

注

英雄記曰時有謠言曰千里草何青青十日卜猶不生又作  
董卓之歌又有道士書布爲呂字以示卓卓不知其爲呂布也  
後漢書五行志云中平京都歌曰承樂世董卓游四郭董卓逃  
蒙天恩董卓帶金紫董卓行謝恩董卓整車騎董卓垂欲發  
董卓與中辭董卓出西門董卓瞻宮殿董卓望京城董卓日

夜絕董逃心摧傷董逃注楊孚卓傳曰卓改爲董安引風俗  
通曰卓以董逃之歌主爲已發大禁絕之死者千數 太平  
御覽卷八百二十引華嶠後漢書云有人書回字於布上負  
而行於市歌曰布乎布乎有告卓者卓不悟又卷七百三十  
五引幽明錄云董卓信巫軍中常有巫都言禱求福利言從  
卓求布倉卒無布有手巾言曰可用耳便書布上如作兩口  
一口大一口小相累以舉謂卓曰慎此也

長安士庶咸相慶賀

杭世駿曰卓別傳云呂布殺卓百姓相對欣喜拊舞皆賣家  
中珠環衣服牀榻以買酒食自相慶賀長安酒肉爲之踴貴  
注張璠漢紀曰初蔡邕以言事見徙名聞天下義動志士及還  
內寵惡之邕恐乃亡命海濱往來依太山羊氏積十年卓爲太

尉辟爲掾以高第爲侍御史治書三日中遂至尙書後遷巴東太守

殿本考證云以言事見徙各本俱誤作以言事見從今從後漢書改正 潘眉曰蔡邕以初平三年卒時尙未有巴東郡當依范史作巴郡太守至建安六年始分巴郡爲巴東巴西二郡邕已沒九年矣

初卓女壻中郎將牛輔典兵別屯陝分遣校尉李傕郭汜張濟畧陳畱潁川諸縣卓死呂布使李肅至陝欲以詔命誅輔輔等遂與肅戰肅敗走宏農布誅肅

杭世駿曰謝承後漢書云董卓死陝中諸將共相要遣使詣長安相聞求乞大赦尙書令王允等以爲殺卓時已赦今復求乞一歲不可再赦傕等曰京師不赦我我當以死決之若

攻長安克之則可得天下不克則盡鈔取三輔婦女財物西上隴西歸鄉里作賊延命尚可數年於是帥兵西向長安

注

典略曰催數設酒請汜或畱汜止宿汜妻懼催與汜婢妾而

奪已愛思有以離間之會催送饋妻乃以鼓爲藥汜將食妻曰食從外來倘或有故遂摘藥示之曰一樓不二雄我固疑將軍之信李公也

殿本考證云袁宏漢紀婢妾下多一私字 沈欽韓曰非子

揚摧篇一樓兩雄其闕嘖嘖

注

帝求米五斛牛骨五具以賜左右

沈欽韓曰牛骨之肩髀全者爲一具

又

欲輔車駕幸黃白城

潘眉曰黃白城在池陽時李催封池陽侯故欲帝幸黃白城

又催大怒欲遣人害溫其從弟應溫故掾也諫之數日乃止

杭世駿曰後漢書趙典傳作董卓從弟應

注催不肯曰我有呂布之功

殿本考證云冊府元龜我有下多討字

又外有董旻承璜以爲鯁毒

趙一清曰卓弟旻兄子璜此云旻承璜豈謂董承耶承是河間人不與卓同郡望蓋因與卓同姓故遂及之卓傳云李催以故牛輔部曲董承爲安集將軍則是時承實在行間也又天子使左中郎將李固持節拜催爲大司馬在三公之右潘眉曰大司馬卽太尉旣改大司馬爲太尉又置大司馬在太尉之上非古制也

催衆叛稍衰弱張濟自陝和解之天子乃得出至新豐霸陵間



後漢書楊震傳云震長子牧牧孫奇爲侍中衛尉從獻帝西遷及李傕脅帝歸其營奇與黃門侍郎鍾繇誘傕部將宋煜楊昂令反傕傕由此孤弱帝乃得東卓本傳云張濟欲遷帝權幸宏農帝亦思舊京因遣使敦請傕求東歸十反乃許車駕卽日發邁

追及天子於宏農之曹陽

杭世駿曰太平寰宇記云李傕郭汜等追乘輿戰於東澗天子幸曹陽墟次田中今謂之曹陽澗武帝改爲好陽澗

注獻帝紀曰初議者欲令天子浮河東下劉艾曰臣前爲陝令知其危險有師猶有傾覆況今無師

殿本考證云後漢書作舊故河師猶時有傾覆

又時中宮僕伏德扶中宮一手持十匹絹乃取德絹連續爲輦

後漢書伏皇后傳云后手持縑數匹董承使符節令孫徽以  
及脅奪之殺傍侍者血濺后衣

奉還承乃以天子還洛陽出箕關下軹道

水經河水注云潞水出垣縣王屋西山潞溪夾山東南流逕  
故城東卽潞關也獻帝自陝北渡安邑東出潞關卽是關也  
顧祖禹曰潞關在山西絳州垣曲縣東北七十里又河南  
懷慶府濟源縣南十三里有軹城卽軹道

袁紹傳高祖父安爲漢司徒自安以下四世居三公位注華嶠漢

書曰安字邵公章帝時爲司徒生蜀郡太守京京弟敞爲司空  
京子湯太尉湯四子長子平平弟成左中郎將並早卒成弟逢  
逢弟隗皆爲公

明監本兩湯字皆作陽按後漢書桓帝紀司空袁湯爲司徒

又司徒袁湯爲太尉又太尉袁湯免皆可證是湯字今殿

本已改正 左中郎將後漢書本傳作五官中郎將

稍遷中軍校尉

中軍後漢書作佐軍章懷注引山陽公載記亦作中軍

又令紹弟虎賁中郎將術選溫厚虎賁二百人

楊雄方言云燕齊之間養馬者謂之娠郭注今之溫厚也

紹旣斬宦者所署司隸校尉許相

後漢書靈帝紀云中平六年司隸校尉袁紹勒兵收僞司隸校尉樊陵河南尹許相及諸閹人無少長皆斬之袁紹傳同此云司隸校尉許相誤也許相以諂事宦官致位台司封侯見范書許劭傳

紹不應橫刀長揖而去

後漢書百官志注引蔡質漢儀曰司隸校尉每會後到先去  
紹時爲司隸故用此儀徑去

注卓謂紹曰皇帝冲闇非萬乘之主

明監本萬乘作萬機誤今 殿本已改正

韓馥長史耿武別駕閔純治中李厯諫馥曰冀州雖鄙帶甲百  
萬穀支十年袁紹孤客窮軍仰我鼻息譬如嬰兒在股掌之上  
絕其哺乳立可餓殺奈何乃欲以州與之又從事趙浮程璜請  
以兵拒之

錢大昕曰後漢書紹傳亦載此事同時進諫者有騎都尉沮  
授而無李厯 按程璜後漢書作程渙

合四州之地又卽表授爲監軍奮威將軍

明監本四州作四川誤今 殿本已改正 奮威後漢書作

奮武 潘眉曰前漢任千秋爲奮威將軍漢末魏武行奮武將軍奮威奮武皆有之未知孰是 趙一清曰紹傳作奮武將軍是也時以劉馥爲奮武將軍不得回授沮生也

卓遣執金吾胡毋班將作大匠吳修齋詔書喻紹紹使河內太守王匡殺之 注漢末名士傳曰班字季皮 又謝承後漢書曰班

與匡書云僕與太傅馬公太僕趙岐少府陰修俱受詔命

後漢書本傳注引漢末名士錄季皮作季友 侯康曰通鑑

考異云范書初平元年六月遣韓融等安集關東袁術王匡各執而殺之三年八月遣馬日磾及趙岐慰撫天下袁紀遣馬趙亦在三年八月時董卓已死而此書云與馬趙俱受詔又云恚卓遷怒自相乖逆疑非班書按溫公之疑是也馬日磾爲太傅在董卓誅後趙岐爲太僕本傳雖未明繫何年而

本紀初平元年有太僕王允太僕袁基二年有太僕魯旭其  
下乃稱太僕趙岐則岐必代魯旭爲太僕者亦在董卓伏誅  
後今胡母班奉卓命撫集關東而稱馬趙爲太僕太僕豈非  
妄哉

卓聞紹得關東乃悉誅紹宗族太傅隗等

後漢書獻帝紀云初平元年三月戊午董卓殺太傅袁隗太  
僕袁基夷其族注云隗紹之叔父基術之母兄 獻帝春秋  
曰尺口以上男女五十餘人皆下獄死 紹傳注引卓別傳  
曰悉埋青城門外東都門內而加書焉又恐有盜取者復以  
尸送郿載之

注  
合戰於界橋南二十里

後漢書本傳注云今貝州宗城縣東有古界城此城近枯漳

水則界橋當在此之側也 顧祖禹曰界橋在北直順德府

廣宗縣東一名袁公橋亦曰界城橋

又遂到瓚營拔其牙門

後漢書本傳注云真人水鏡經曰凡軍始出令牙竿必令完堅若有折將軍不利牙門旗竿軍之精也卽周禮司常職之旌門是也

又紹旣破瓚引軍南到薄洛津

後漢書郡國志云安平國經西有漳水津名薄洛津又紹傳云三月上巳大會賓徒於薄洛津注引酈元水經注云漳水經鉅鹿故城西謂之薄洛津

又身自扞衛送到斥邱 又乃引軍入朝歌鹿場山蒼巖谷

後漢書郡國志云魏郡斥邱又云朝歌有鹿腹山紹傳作鹿

腸山 水經清水注云清水東與倉水合水出西北方山在衛縣西有倉谷

注薄擊諸賊左髮丈八等皆斬之又擊劉石青牛角黃龍左校郭大賢李大目干氏根等皆屠其屯壁

潘眉曰張燕傳注引張璠漢紀後漢書朱雋袁紹傳皆作左髭丈八此作左髮字之誤也此是一種賊號漢紀謂左校郭大賢左髭丈八三部蓋左校一部郭大賢一部左髭丈八一部也青字誤當作張張燕本姓褚以冒牛角姓爲張故張燕傳及章懷後漢書注引九州春秋並云博陵張牛角

注九州春秋曰紹延徵北海鄭元而不禮又英雄記載太祖作董卓歌辭曰德行不虧缺變化自難常鄭康成行酒伏地氣絕郭景圖命盡於園桑如此之文則元無病而卒



按後漢書鄭元本傳稱紹總兵冀州遣使要元大會賓客元最後至乃延升上坐與諸客辨對莫不嗟服應劭亦在坐願爲弟子紹乃舉元茂才表爲左中郎將皆不就其事如此安得有有禮之事又稱紹與曹操相拒官渡逼元隨軍不得已載病到元城縣疾篤不進而卒年七十四又安得有行酒伏地氣絕之事知此注所引皆妄且與前言紹能折節下士士多附之云云相矛盾也 太平寰宇記卷二十四云鄭元墓在高密縣西北十里元此縣人也 高士傳云元卒葬於劇東後以墓壞歸葬礪阜在高密縣西北五十里

注 孤欲令四兒各據一州

紹三子譚尙熙連外甥高幹數之故云四兒

注 監軍之計計在持牢

梁玉繩曰後漢書持牢作將牢疑持字誤晉書姚萇載記陛下將牢太過耳可證

注魏氏春秋載紹檄州郡文曰蓋聞明主圖危以制變忠臣慮難以立權

文選載此文首有左將軍領豫州刺史郡國相守又立權句下有是以有非常之人然後有非常之事有非常之事然後立非常之功夫非常者故非常人所擬也三十七字後漢書亦無之 按此陳琳之辭此注所引與後漢書袁紹傳所載並有節文今以文選所錄校補如左

又專制朝命威福由已終有望夷之禍汙辱至今

文選命作權由已下有時人迫脅莫敢正言八字望夷之禍作望夷之敗此句下有祖宗焚滅四字汙辱至今句下有永

爲世鑒四字

又及臻吕后祿產專政擅斷萬機又誅夷逆亂

文選吕后有季年二字專政下有內兼二軍外統梁趙八字逆亂作逆暴

又道化興隆光明顯融

文選道化作王道紹傳顯融作融顯

又祖父騰故中常侍又父嵩乞丐攜養因贓假位

文選作祖父中常侍騰何焯曰范書宦官傳嵩靈帝時貨賂中官及輪西園錢一億萬故位至太尉

又幕府昔統鷹揚掃夷兇逆又方收羅英雄棄瑕錄用故遂與

操參咨策略

文選昔作董夷作除無方字參咨策略作同諮合謀下有授

以裨帥四字

又至其愚佻短慮 又表行東郡太守兗州刺史

文選慮作畧東郡下無太守二字兗州上有領字

又被以虎文授以偏師獎就威柄冀獲秦師一克之報

文選無授以偏師四字獎就作獎蹙注云魏志作獎蹙蹙成也言獎成其威柄也按後漢書亦作就 陳景雲曰魏志既

與文選同似不必贅引當云後漢書作獎就就成也 朱珔

曰當本作就而誤加足旁作蹙又誤爲蹙耳 克文選作尅

又而操遂乘資跋扈肆行酷烈

後漢書無操字文選乘資作承資酷烈作凶忒

又英才俊逸天下知名以直言正色

文選逸作偉無以字 後漢書無天下知名四字

又身被梟懸之戮 又民怨彌重

文選身下有首字 後漢書民怨彌重作人怨天怒

又故復援旌擐甲席卷赴征金鼓響振布衆破沮

後漢書旌作旂 文選赴作起振作震破作奔 李善曰紹

征呂布諸史不載蓋史略也

又復其方伯之任是則幕府無德於充土之民

文選任作位無是字 後漢書無之民二字

又後會鑾駕東反羣虜亂政

後漢書後會作會後 文選東反作反旆亂政作寇攻

又而便放志專行脅遷省禁卑侮王宮 又坐召三臺

文選而便作操便省禁上有當御二字王宮作王室召作領

後漢書脅遷作威劫宮作僚

又所惡滅三族羣談者蒙顯誅

後漢書惡作怨 文選蒙作受

又道路以目百寮鉗口尙書記朝會

文選作百寮鉗口道路以目 後漢書朝作期

又故太尉楊彪歷典三司享國極位

文選歷典三司作典歷二司後漢書亦作二司彪爲司空司徒此作三誤也 後漢書享國作元綱

又操因睚眦被以非罪榜楚並兼五毒俱至觸情放慝不顧憲

章

文選因下有緣字并兼作參并俱作備放慝作任武章作綱議有可納故聖朝含聽改容加錫

文選議作義下二句作是以聖朝含聽改容加飾

又操欲迷奪時權又先帝母弟墳口尊顯松柏桑梓猶宜恭肅而操率將校吏士親臨發掘

文選時權作時明母弟作母昆松柏桑梓猶宜恭肅作桑梓松柏猶宜肅恭後漢書無而字文選無校字

又又署發邱中郎將摸金校尉所過墮突

文選又署二字作操又特置四字墮作墮是也此誤

又身處三公之官而行桀虜之態殄國虐民毒流人鬼又動足

蹈機陷又帝都有嗟吁之怨

文選官作位殄作汙流作施蹈作觸嗟吁作吁嗟後漢書

吁作吁

又歷觀古今書籍所載貪殘虐烈無道之臣

文選作歷觀載籍無道之臣貪殘酷烈

又加意含覆 又乃欲撓折棟梁 又除滅中正

文選意作緒覆作容撓折作摧撓中正作忠正是也此誤作中耳 後漢書作除忠害善

又往歲伐鼓北征討公孫瓚強禦桀逆 又欲託助王師以相掩襲

文選歲作者無討字 後漢書禦作寇欲託助王師以相掩襲作外助王師內相掩襲

又會其行人發露瓚亦梟夷故使鋒芒坐縮厥圖不果屯據曹倉阻河爲固乃欲以螳螂之斧禦隆車之隧

後漢書無其字 何焯曰范史注引獻帝春秋云曹引軍渡河託言助紹實圖襲鄴以爲瓚援會瓚破滅紹亦覺之以軍退屯於敖倉坐字乃挫字之誤 文選屯據曹倉上有爾乃



大軍過蕩西山屠各左校皆束手奉質爭爲前登犬羊殘醜  
消淪山谷於是操師震懼昏夜逋遁三十九字欲上無乃字

後漢書以作運

又并州越太行青州涉濟漯大軍汎黃河以角其前荊州下宛  
葉而犄其後雷震虎步並集虜庭若舉炎火以熖飛蓬覆滄海  
而沃燹炭有何不消滅者哉

文選以角作而角而沃作以沃無消字此下有云又操軍吏  
士其可戰者皆出自幽冀或故營部曲咸怨曠思歸流涕北  
顧其餘充豫之民及呂布張楊之遺衆覆亡迫脅權時苟從  
各被瘡夷人爲讐敵若迴旆方徂登高岡而擊鼓吹揚素揮  
以啟降路必土崩瓦解不俟血刃凡八十六字 趙一清曰  
後漢書傳並文選注皆云并州紹甥高幹青州紹長子譚荆

州剽表表與紹交故云下宛葉

又當今漢道陵遲綱弛紀絕

後漢書當作方紀作綱 文選作方今漢室陵遲綱維弛絕  
又此下有聖朝無一介之輔股肱無折衝之勢方畿之內簡  
練之臣皆垂頭塌翼莫所憑恃雖有忠義之佐脅於暴虐之  
臣焉能展其節凡四十八字

又操以精兵七百圍守宮闕外稱陪衛內以拘執

文選作又操持精兵七百圍守宮闕外託宿衛內實拘執

又懼其篡逆之禍因斯而作乃忠臣肝腦塗地之秋烈士立功  
之會也可不勗哉

文選禍作萌乃上有此字會下無也字此下尙有操又矯命  
稱制遣使發兵恐邊遠州郡過聽而給與強寇弱主違衆旅

叛舉以喪名爲天下笑則明哲不取也卽日幽并青冀四州並進書到荊州便勒見兵與建忠將軍協同聲勢州郡各整戎馬羅落境界舉師揚威並匡社稷則非常之功於是乎著其得操首者封五千戶侯賞錢五十萬部曲偏裨將校諸吏降者勿有所問廣宣恩信班揚符賞布告天下咸使知聖朝有拘偪之難如律令凡百五十字

### 紹進軍黎陽

杭世駿曰古今刀劍錄云袁紹在黎陽夢有一神遺一寶刀及覺果在臥所銘曰思召紹解之曰思召紹字也

### 注說曰旂發石也

殿本考證云太平御覽引說曰作說文曰潘眉曰春秋正義賈逵以旂爲發石一曰飛石引范蠡兵法作飛石之事證

之釋文云旛說文作檜建大木置石其上發機以碓敵按今說文作旛在旡部與釋文所引異

### 瓊宿鳥巢

水經濟水注云濟瀆又東逕酸棗縣之鳥巢澤在酸棗之東南曹太祖破袁紹運處也

紹還謂左右曰吾不用田豐言果爲所笑遂殺之

水經渠水注云渠水又東逕田豐祠北袁本初慚不納其言害之時人嘉其誠謀無辜見戮故立祠於是

### 自軍敗後發病七年憂死

潘眉曰魏志載荀彧阻董昭等九錫議太祖心不能平或以憂薨裴注引傅子言明帝疏劉子揚遂發狂以憂死兩處憂字不誤此傳云七年憂死憂乃夏字之誤紹以夏五月死見

武帝紀

太祖渡河攻譚譚告急於尙又尙自將兵助譚與太祖相拒於黎陽自二月至九月大戰城下

潘眉曰紹以五月死公征譚尙在是年九月至明年三月乃大破之此二月至九月倒誤當作自九月至明年三月後漢書作自九月至明年二月較明晰然二月亦誤蓋以三月破之夏四月進攻鄴五月還許也

注雖亡之日猶存之年也

明監本年作願誤今 殿本已改正

又夫伯游之恨於齊未若文公之忿曹又當惟義是務又乃議曲直之計又復能勦力爲君之役哉

潘眉曰文公後漢書作太公章懷注言太公者尊之爲紹也

此作文公誤 錢大昭曰後漢書義作曹計作評爲君作仁君皆是當從之

又季友獻歛而行鍼叔之鳩

錢大昭曰鍼叔左傳作鍼季後漢書作而行叔牙之誅

又昔先公廢黜將軍以續賢兄立我將軍以爲適嗣上告祖靈下書譜牒先公謂將軍爲兄子將軍謂先公爲叔父

梁玉繩曰此古者本生父母不稱父母之證

又孤雖有老母輒使身體完具而已

殿本考證云輒宋本作趣

又旣不見赦而屠辱各二三其心臨陳叛戾

陳景雲曰屠下衍一辱字屠各者匈奴種也是時袁尙攻譚倚匈奴爲助及交鋒之後譚兵擊其前屠各叛於後故繼云

進退無功首尾受敵也

尙聞太祖北釋平原還鄴其將呂曠呂詳叛尙歸太祖

呂詳後漢書作高翔是也此誤

尙還走濫口

濫口後漢書作藍口章懷注相州安陽縣界有藍嵯山與鄴相近蓋藍山之口

沮配兄子榮守東門夜開門內太祖兵注配字正南魏郡人又

自卿文榮耳配曰小兒不足用乃至此

沈欽韓曰隸釋陳球碑陰故吏陰安審配則配是魏郡陰安人盧明楷曰此明言兄子榮則下文榮疑爲子榮之誤

又曩曰孤之行圍何弩之多也配曰恨其少耳

後漢書審配令士卒曰堅守死戰操軍疲矣幽州方至何憂

無主操出行圍配伏弩射之幾中

自屯龍奏

胡三省曰龍奏城在平原勃海間爲河津要口

十二月太祖軍其門譚不出夜遁奔南皮臨清河而屯十年正月攻拔之斬譚及圖等

太平寰宇記卷六十五云滄州南皮縣有曹公固卽漢京兆尹雋不疑葬所魏太祖因冢爲固以及袁氏因爲曹公固焉又縣東有觀臺袁譚所築魏武擒譚於此

上洛都尉捕斬之

顧祖禹曰商州上洛廢縣漢末以縣在武關峽關之間置上洛都尉

注 尙寒求席熙曰頭顱方行萬里何席之爲又熙字顯奕



後漢書熙曰作康曰是也此公孫康語熙字誤顯奕後漢書作顯雍

<sup>注</sup>奉養兄姊宗族稱孝悌焉

後漢書注無孝字是也既云奉養兄姊則孝字宜衍

三國志旁證卷九

閩長樂梁章鉅撰

袁術傳

會長沙太守孫堅殺南陽太守張咨術得據其郡

後漢書袁術傳云劉表上術爲南陽太守 水經洛水注云

合水東北流注於公路澗世俗音譌號光祿澗非也上有袁

術固四周絕澗迢遞百仞廣四五里有一水淵而不流又云

九山谿水北徑袁公塢東蓋公路始固有此也故有袁公之

名矣 太平寰宇記卷五云袁術固一名袁術塢在河南緱

氏縣西南十五里四面絕澗甚險 宋武北征記云少室西

山有袁術固可容十萬人一夫守隘千人莫當又有公路壘

公路澗在縣西南三里

術以餘衆奔九江殺揚州刺史陳溫領其州 注臣松之案英雄

三國志卷之九  
記陳溫字元悌汝南人先爲揚州刺史自病死又如此則溫不爲術所殺與本傳不同

按後漢書獻帝初平四年三月袁術殺揚州刺史陳溫據淮南術傳亦云殺揚州刺史陳溫而自領之皆與志同不得以英雄記之言爲疑也

以張勳橋蕤等爲大將

殿本考證云大將監本作大將軍呂布傳云遣大將張勳攻布軍字衍文今改正

注備軍中千餘人

殿本考證云通鑑作條軍中千餘人

時沛相下邳陳珪

後漢書陳球傳注引謝承書云珪字漢瑜舉孝廉劇令去官

舉茂才濟北相 魏書地形志云下邳郡歸正縣有陳珪墓  
在今江南邳州境

術嘿然不悅用河南張燭之符命遂僭號

後漢書獻帝紀云建安二年春袁術自稱天子九月殺陳王  
寵又陳敬王羨傳云義兵起寵率衆屯陽夏自稱輔漢大將  
軍袁術遣客詐殺國相駱俊及寵 太平寰宇記卷十六云  
泗州招信縣本漢淮陵縣有公路城在縣北六十里袁術僭  
號九江曹操征之術渡江築此城以自據

注乃建號稱仲氏

後漢書仲氏作仲家注仲或作沖

以九江太守爲淮南尹置公卿祠南北郊荒侈滋甚

後漢書楊彪傳注引華嶠書云東京楊氏袁氏累世宰相爲

漢名族然袁氏車馬衣服極爲奢僭能守家風爲世所貴不及楊氏也

術前爲呂布所破後爲太祖所敗奔其部曲雷簿陳蘭於潯山復爲所拒憂懼不知所出

雷簿劉馥傳作雷緒陳蘭後漢書作陳簡

劉表傳

劉表字景升山陽高平人也少知名號八俊

注張璠漢紀

曰表與同郡人張隱薛郁王訪宣靖公褚恭劉祇田林爲八友或謂之八顧漢末名士錄云表與汝南陳翔字仲麟范滂字孟博魯國孔昱字世元勃海苑康字仲真山陽檀敷字文友張儉字元節南陽岑暉字公孝爲八友

陳景雲曰公褚恭褚字當作緒複姓也見後漢書黨錮傳

按此一交游之末耳而或爲八俊或爲八顧或爲八友紀載

歧互如此 趙一清曰七友後漢書俱有傳皆不及當塗之  
難惟張儉以年高見徵

以大將軍掾爲北軍中候

潘眉曰凡軍有候南軍領於衛尉其候官名衛候北軍領於  
中壘校尉其候官名中候南軍不屬中尉惟北軍屬中尉故  
但有北軍中候而無南軍中候或稱中候或稱軍中候或稱  
北軍中候或稱北軍軍中候

注 荆州八郡可傳檄而定

後漢書劉表傳注引漢官儀云荆州管長沙零陵桂陽南陽  
江夏武陵南郡章陵等是也 趙一清曰後漢書郡國志荆  
州只是七郡而無章陵疑是漢末立下文裴注云詔書拜蒯  
越爲章陵太守是也曹魏因之故趙儼亦爲章陵太守然武

三國志卷之七  
帝建安二年南陽章陵諸縣復叛爲繡則其時尚未爲郡當  
在是年之後

注遣人誘宗賊至者五十五人皆斬之

後漢書五十五人作十五人

治中鄧羲諫表

錢大昭曰後漢書作侍中從事非也時州牧有長史有別駕  
有治中至於侍中乃中朝官非表所得有也

注英雄記曰張羨先作零陵桂陽長甚得江湘間心

潘眉曰縣官千石至六百石稱令五百石稱長長爲令之次  
零陵桂楊皆荊州郡此長字誤也章懷注引英雄記作零陵  
桂陽守當依之

注英雄記曰州界羣寇旣盡表乃開立學宮博求儒士使綦母

閻宋忠等撰定五經章句謂之後定

隋書經籍志周易五卷漢荊州牧劉表章句又有新定禮一卷後漢書儒林傳云顏容字子嚴陳國長平人博學多通善春秋左氏初平中避亂荊州聚徒千餘人劉表以爲武陵太守不肯起著春秋左氏條例五萬餘言晉書天文志雜星氣條云劉表命武陵太守劉叡集天文衆占名荊州占何焯曰喪亂中經籍不遂泯絕實賴此舉非可以表無遠畧嗤爲不急之務也

初表及妻愛少子琮欲以爲後而蔡瑁張允爲之支黨乃出長子琦爲江夏太守衆遂奉琮爲嗣琦與琮遂爲讐隙

後漢書云表初以琦貌類於己甚愛之後爲琮娶其後妻蔡氏之姪蔡氏遂愛琮而惡琦毀譽之言日聞於表表寵耽後



妻每信受焉又妻弟蔡瑁及外生張允並得幸於表又睦於琮遂以琮爲嗣琮以侯印授琦琦怒投之地將因奔喪作難會曹操軍至新野琦走江南趙一清曰典論稱琦性慈孝且表之亡也南土已危詎暇爲譚尙之爭乎作難之言似未足據也又按表尙有小子名脩字季緒見陳思王傳注

太祖軍到襄陽琮舉州降

水經沔水注云宜城縣有太山建安三年崩聲聞五六十里雉皆屋雖縣人惡之以問侍中龐季云山崩川竭國土將亡之占也十三年魏武平荊州沔南彫散

注言自中興以來荊州獨全

何焯曰中興當作中平

注魏武故事載令曰楚有江漢山川之險後服先強與秦爭衡

殿本考證云監本服誤復今據何焯校本改正 沈欽韓曰  
穀梁莊十年傳荆者楚也何爲狄之聖人立必後至天子弱  
必先強所謂後服先疆也

注 詔書拜章陵太守

趙一清曰章陵故舂陵本南陽之屬縣也續志有晉宋志無  
蓋後漢嘗立爲郡曹魏時省入蔡陽矣

注 零陵先賢傳曰

隋書經籍志有零陵先賢傳一卷

注 摯虞文章志曰不疑死時年十七著文論四首

藝文類聚卷九十九引零陵先賢傳云周不疑曹公欲以爲  
議郎不就時有白雀瑞儒林竝已作頌援紙筆立命復作操  
奇異之按此卽文論四首之一歟

三國志卷之四  
注世語曰表死後八十餘年至晉太康中表冢見發表及妻身形如生芬香聞數里

趙一清曰水經沔水注襄陽城東門外二百步劉表墓今墳冢祠堂猶高顯整頓又述征記云劉表墓在高平郡表卒擣四方珍香數十斛置棺中蘇合消疫之香畢備永嘉中郡人發其墓表如生香聞數十里

呂布傳呂布字奉先五原郡九原人也

後漢書郡國志云五原郡秦九原郡武帝更名顧祖禹曰九原城在山西忻山西漢置京陵縣屬太原郡師古曰卽九京也漢末改置九原縣而陝西榆林衛西有九原廢縣漢五原郡治後漢末廢一統志云九原故城在蒙古吳噉忒旗北

以驍武給并州刺史丁原爲騎都尉屯河內以布爲主簿大見親待

潘眉曰後漢書云以弓馬驍武給并州刺史丁原爲騎都尉原屯河內以布爲主簿劉攽刊誤云下原字合在上原字下蓋原爲騎都尉以布爲主簿也按刊誤說是也刺史屬吏惟有主簿功曹簿曹書佐等騎都尉秩比二千石非刺史所得置呂布爲騎都尉在殺丁原後此時未得爲也後漢書誤移原字在爲騎都尉下此傳并脫去原字當補入

卓常以布自衛然卓性剛而褊忿不思難嘗小失意拔手戟擲布布拳捷避之由是陰怨卓卓常使布守中閤布與卓侍婢私通恐事發覺心不自安

後漢書呂布傳及王允傳皆作與傳婢情通 潘眉曰傳婢

與侍婢同無誤字 按今小說有王允獻貂蟬作連環計事  
卽由侍婢私通一語演出亦非盡無因李長吉呂將軍歌榼  
榼銀龜搖白馬傳粉女郎大旗下卽指此事也

允以布爲奮威將軍假節儀比三司進封溫侯

潘眉曰奮威當作奮武宋書百官志奮武將軍漢末呂布爲  
之後漢書亦誤作威

布有良馬曰赤兔

注

曹瞞傳曰時人語曰人中有呂布馬中有

赤兔

按布所乘赤兔馬小說家輒謂布敗後爲曹操所得以贈關  
公亦想當然非事實也

注

謂楊曰布卿州里也

潘眉曰布五原人張楊雲中人五原雲中皆并州郡

傳張邈 張邈字孟卓東平壽張人也

錢大昭曰後漢書張邈事卽附在呂布傳中故張邈之前布事未終張邈之後仍叙布事且其作贊言布不言邈大畧與魏志同蓋蔚宗因承祚之舊故也魏志本以張邈陳登附布傳以陳容附臧洪傳後之校書者見有張邈字孟卓東平壽張人也十一字不及細檢輒於卷首改題云呂布張邈臧洪傳而於目錄則云張邈

陳登臧洪陳容皆誤

君以千里之衆當四戰之地

呂布傳作十萬之衆

邈從布留超將家屬屯雍邱太祖攻圍數月屠之斬超

錢大昭曰武帝紀雍邱潰超自殺則張超非爲魏武斬也

注昔將金元休向兗州甫詣封部

封部當從後漢書作封邱

注典畧曰獻帝初爲兗州刺史東之郡

劉放曰刺史不當言郡蓋是部字也

丹陽兵有千人屯西白城門內

白門下邳之城門卽布受擒於曹公處也城門二字宜互乙布謂靈等曰元德布弟也弟爲諸君所困故來救之布性不喜合鬪但喜解鬪耳布令門候於營門中舉一隻戟布言諸君觀布射戟小支一發中者諸軍當解去不中可留決鬪布舉弓射戟正中小支諸將皆驚言將軍天威也

林暢園師曰呂布一粗人不料亦有此深沉之幾蘊藉之度術欲結布爲援乃爲子索布女布許之術遣求迎婦陳珪曰曹公奉迎天子輔讚國政威靈命世將征四海將軍宜與協同策

謀圖太山之安今與術結婚受天下不義之名必有累卵之危布亦怨術初不已受也女已在塗追還絕婚

按前後注中所引英雄記云布恐術爲女不至故不遣兵救也以綿纏女身縛著馬上夜自送女出與術與太祖守兵相觸格射不得過又云布將河內郝萌反將兵入布所治下邳府攻閤閤堅不得入布不知反者爲誰直牽婦科頭袒衣相將從濶上排壁出又云布欲令陳宮高順守城自將騎斷太祖祖糧道布妻謂曰宮順素不知和將軍一出宮順必不同心如有蹉跌將軍當如何自立乎妾昔在長安已爲將軍所棄賴得龐舒私藏妾身耳今不須顧妾也又云布謂太祖曰布待諸將厚也諸將臨急皆叛布耳太祖曰卿背妻愛諸將婦何以爲厚布默然合此觀之則爲布妻女者亦極不幸亦布



之生平宜有此報耳

注

二將軍拔大駕來東

又

造策者

又

霸畏布引還抄暴

後漢書拔作扶是也造策元本作告策

何焯曰引還二字

衍

布遣人求救於術術自將千餘騎出戰敗走還保城不敢出

盧明楷曰此二句應作布遣人求救於術自將千餘騎出戰

敗走下術字疑衍

按此說是也下卽接云術亦不能救文

法甚明

布與其麾下登白門樓

水經泗水注云下邳南門謂之白門布傳注引北征記曰下

邳城有三重大城周四里呂布所守也魏武擒布於白門白

門大城之門

趙一清曰前注引英雄記白門是下邳西城

門又太平寰宇記卷十六謂大城周十二里半中城周四里  
所說不同

太祖有疑色劉備進曰明公不見布之事丁建陽及董太師乎  
太祖頷之

于慎行曰呂布劍客之雄耳非大豪也然使得爲操用夏侯  
惇許褚之流遠出其下何至如丁原董卓哉而元德不肯一  
言非忌布也乃忌操也先主此等識見又操所不能參耳

陳登傳陳登者字元龍在廣陵有威名又年三十九卒後許汜與  
劉備並在荊州牧劉表坐表與備共論天下人汜曰陳元龍湖  
海之士豪氣未除

趙一清曰世說注引襄陽耆舊傳許汜是楊慮同里人少師  
慮爲魏武從事中郎在劉表坐論陳元龍者其人也 潘眉

曰世說補引作陳元龍淮海之士明人所見善本三國志湖  
海爲淮海故所引如此元龍下邳人作淮海爲是 何焯曰  
豪氣謂驕氣彼時謂驕曰豪魏畧畢軌在并州名爲驕豪是  
也

注百姓畏而愛之

太平寰宇記卷百二十三云愛敬陂在江都縣西十五里陳  
登初開此陂百姓愛而敬之因以爲名亦號陳登塘

又孫策遣軍攻登於匡琦城

趙一清曰匡琦似是人姓名如高遷屯白超壘之類陳矯傳  
作匡奇案建安十三年孫權圍合肥使張昭攻九江之當塗  
而張昭傳注引吳書云別討匡琦則匡琦卽當塗城也

又遷登爲東城太守

趙一清曰漢書地理志九江郡東城縣後漢省故續志無之  
未聞立郡也此城字疑郡字之誤登由廣陵遷東郡旣去而  
淮南遂虛曹公故追恨不用其計也若仍在九江則何歎恨  
之有哉

臧洪傳臧洪字子源廣陵射陽人也

潘眉曰魏書爲董卓立傳兼及李傕郭汜者叙亡漢之原委  
爲二袁劉表呂布張邈公孫瓚陶謙張揚公孫度張燕張繡  
張魯立傳者叙同時割據魏武兼并之始末若臧洪始爲張  
超功曹後袁紹徙爲東郡太守太祖圍張超洪請救不得怨  
紹爲紹所殺未與太祖交兵其人與魏事無涉在魏書中當  
爲附傳不應立專傳觀其初爲盟詞曰漢室不幸皇綱失統  
及爲紹所執又曰皇室衰弱無扶翼之意蓋漢末義烈之士

歸漢書立專傳宜也 顧祖禹曰射陽漢縣三國時廢晉復

置在淮安鹽城縣西十九里

父旻歷匈奴中郎將中山太原太守

注除盧奴令

趙一清曰後漢中山是王國當云相中山國都治盧奴注云  
爲盧奴令是也恐傳有誤 一統志云盧奴故城令定州治  
東萊劉繇下邑長東海王朗菑邱長洪卽邱長

沈欽韓曰續漢志梁國治下邑而元和郡國志云後漢無下  
邑縣魏復立焉其疎如此 顧祖禹曰下邑故城在歸德州  
夏邑縣西南 一統志云菑邱廢縣在宿州東北六十里于

欽齊乘卽邱城在沂州東南五十里

太守張超請洪爲功曹

又

與洪西至陳留見兄邈計事邈謂超

曰聞弟爲郡守政教威恩不由已出動任臧洪洪者何人超曰

洪才畧智數優超超甚愛之海內奇士也邈卽引見洪與語大異之致之於劉兗州公山孔豫州公緒皆與洪親善乃設壇場方共盟誓諸州郡更相讓莫敢當咸共推洪洪乃升壇搯槃歃血而盟又洪辭氣慷慨涕泣橫下聞其言者雖卒伍廝養莫不激揚人思致節

王鳴盛曰劉岱字公山孔伋字公緒見太祖紀此段乃陳壽自執筆叙臧洪事非詞命比何爲於二刺史稱字乎漢季風氣好稱人字此必壽沿襲他人紀載之言未及改正耳沈欽韓曰左氏襄二十七年傳叔向謂趙孟曰諸侯盟小國固必有尸盟者注云小國主辦具正義云如哀十七年執牛耳之類皆小國主備之法當小國執牛耳亦曰尸盟哀公與齊侯盟於蒙孟武伯問于高柴諸侯盟誰執牛耳而武伯當之

是也國君以次雍容受畝而已今此諸牧守同盟去古未遠猶曉其制故洪以郡掾尸盟非是推讓莫敢先洪也

洪在州二年羣盜奔走紹歎其能

後漢書臧洪傳歎作憚

昔張景明親登壇啖血

趙一清曰張景明名導水經濁漳水注張導字景明建和三

年

建和當作建安

爲鉅鹿太守漳津汎濫土不稼穡披案地圖與丞

彭參掾馬道嵩等原其順逆揆其表裡備防排通以正水路功績有成此用嘉賴題云漳和神壇碑卽是人也

注徐衆三國評曰

隋書經籍志三國評三卷宋徐爰撰衆字誤也

公孫瓚傳公孫瓚字伯珪遼西令支人也爲郡門下書佐

顧祖禹曰令支城在永平府東北 後漢書公孫瓚傳云家世二千石以母賤遂爲郡小吏

有姿儀大音聲故太守器之以女妻焉注典畧曰瓚性辨慧每白事不肯稍入常摠說數曹事無有忘誤太守奇其才

後漢書注引魏志作侯太守妻之以女何焯曰繫太守以侯氏者所以別下劉太守也

遣詣涿郡盧植讀經後復爲郡吏劉太守坐事徵詣廷尉瓚爲御車身執徒養及劉徙日南瓚具米肉於北芒上祭先人舉觴祝曰昔爲人子今爲人臣當詣日南日南障氣或恐不還與先人辭於此再拜慷慨而起見者莫不歔歔

何焯曰瓚旣遼西人前世又非素官於朝何緣先墓乃在北芒 按趙一清謂遼西亦有北芒未知所據 障與瘴同今



殿本作瘴後漢書障上有多字

除遼東屬國長史

錢大昭曰續漢書云每部置太守一人丞一人郡當邊戍者丞爲長史每屬國置都尉一人丞一人屬國長史卽屬國丞耳不知何時改此制

假瓚都督行事傳使將之軍

潘眉曰釋名傳轉也轉移所在執以爲信也後漢書申屠蟠傳爲封傳護送注傳爲符牒陳蕃傳投傳而去注傳符也

朝議以宗正東海劉伯安既有德義

按此與前稱劉公山孔公緒同 錢大昭曰紀事之文當稱

名承祚志多有稱字者如此傳之劉伯安虞管寧傳之陳仲

弓實許靖潘濬尹默傳之宋仲子忠張裔傳之許文休靖彭

兼傳之秦子勅必尹默傳之司馬德操徽秦宓傳之任定祖

安譙允南

周

顧雍傳之蔡伯喈

邕

士燮傳之劉子奇

陶

皆是

若孫炎之稱叔然則以避晉武帝諱故也

袁紹韓馥議以爲少帝制於姦臣天下無所歸心虞宗室知名民之望也遂推虞爲帝

何焯曰此紹等之謬計然亦可見昭烈當日之足以有爲但屬宗室自爲人所服從乃兩漢稍存封建之效也

注

是時有四星會於箕尾

又

濟陰男子王定得玉印文曰虞爲

天子

何焯曰四星會於箕尾昭烈起涿郡之祥虞爲天子魏虞後也趙一清曰當時有以魏爲舜後者故何云然見蔣濟傳是時術遣孫堅屯陽城拒卓紹使周昂奪其處

錢大昕曰陳景雲謂魚豢典畧載瓚表列紹罪亦作周昂據孫堅傳注引吳錄及會稽典錄則紹所遣與堅相持者乃會稽周暘非昂也昂乃暘之兄爲九江太守袁術攻破之其事別見孫賁傳吳錄典錄皆同蓋賁傳仍吳史舊文而瓚傳周昂似沿典畧之失也范史瓚傳作周昕案漢末昕爲丹陽太守見孫靜傳注無奪據陽城事此范史之誤 趙一清曰瓚表紹罪狀亦云周昂而瓚傳作周昕案吳志孫靜傳昕爲孫策所殺孫堅傳注引吳錄云袁紹遣會稽周暘爲豫州刺史來襲取州暘字仁明周昕之弟也又引會稽典錄曰暘與堅爭豫州屢戰失利會次兄九江太守昂爲袁術所攻暘往助之軍敗還鄉里爲許貢所害則昂自爲袁術所攻與堅無與且以周暘爲得其實蓋周昂兄弟三人皆與孫氏爲讐敵故

各書所記不同也

軍屯磐河

磐河卽舛河水經河水注所謂東入舛縣爲舛河也

欲以結援

殿本考證云宋本作欲以自結援

進軍界橋

後漢書獻帝紀注云今貝州宗城縣有古界城近枯漳水則界橋在此也

<sup>注</sup>紹又上故上谷太守高焉故甘陵相姚貢橫責其錢

殿本考證云又上上字或爲止字之訛

<sup>注</sup>虞衆大潰奔居庸城瓚攻及家屬以還

趙一清曰攻下有脫文虞傳云攻之三日城陷遂執虞并妻

子還薊

注自號爲伯三人者爲仲叔季

殿本考證云北宋本三人上多一謂字

瓚軍數敗乃走還易京固守注瓚以易當之乃築京固守

水經易水注云瓚自薊徙臨易水謂之易京在易城西四五里趙建武四年石虎以京障至固令二萬人廢壞之今者城壁夷平其樓基尙存猶高一匹餘基上有井世名易京樓沈欽韓曰爾雅釋邱絕高謂之京注人力所作

兵法百樓不攻今吾樓櫓千重食盡此穀足知天下之事矣按兵法百樓不攻語不知所出沈欽韓引墨子備城門百步一木樓二百步一大樓語爲證亦未確

注遂躍馬控弦處我疆土又用及龍河之師

殿本考證云控弦一作橫弦疆土一作疆上龍河卽龍湊也  
瓚遣子求救於黑山賊復欲自將突騎直出傍西南山

趙一清曰南字衍西山謂太行山張燕傳所云常山趙郡中  
山上黨河北諸山谷皆相通是也

注乃遣間使與續書紹候者得之使陳琳更其書曰蓋聞在昔  
衰周之世僵尸流血以爲不然豈意今日身當其衝

按陳琳更下當有脫文在昔衰周以下二十四字無關要害  
後漢書作瓚與續書發端語者近之非琳所更也後言紹候  
者得其書如期舉火瓚以爲救兵至遂出欲戰紹設伏擊大  
破之則琳所更書必使續緩進之計以遲其期也

又袁紹分部攻者

何焯曰分部當作部分

拜左渡遼將軍封亭侯又文帝踐阼拜輔虎牙將軍

潘眉曰鮮于輔封南昌亭侯見魏公卿上尊號奏碑而武帝十八年紀注作昌鄉亭侯誤又據公卿上尊號奏稱虎牙將軍南昌亭侯臣輔輔在延康中已爲虎牙將軍此傳亦誤

陶謙傳陶謙字恭祖丹陽人

顧祖禹曰丹陽城在江甯府西南五十里兩漢爲丹陽縣屬丹陽郡隋開皇九年廢入溧水縣俗謂之小丹陽對丹陽郡而言也按晉志丹陽山多赤柳故名丹楊則作陽者誤矣

除盧令注除舒令

錢大昭曰志除盧令注引吳書作舒令考張子布哀辭云令舒及盧遺愛於民是謙於二縣並爲令也

注郡守張磐同郡先輩與謙父友意殊親之而謙恥爲之屈嘗

以舞屬謙謙不爲起固彊之及舞又不轉磐曰不當轉邪曰不可轉轉則勝人由是不樂卒以構隙

太平御覽卷五百七十四引作乃舞舞不轉 沈欽韓曰通典樂五云前代宴樂必舞魏晉以來尤重以舞相屬謝安以屬桓嗣是也按後漢書蔡邕傳徙朔方赦還太守王智餞之起舞屬邕邕不爲報智銜之是賓主歡洽之常態也淮南齊俗訓古者歌樂而無轉又脩務訓今鼓舞者繞身若環此所謂轉也漢書注長沙定王來朝有詔稱壽歌舞定王但張袖小舞手上怪問之對曰臣國小地狹不足回旋是則舞故不轉以示意與此事正同也

又謙在官清白無以糾舉祠靈星有贏錢五百欲以臧之謙委官而去



沈欽韓曰續漢祭祀志云高帝令天下立靈星祠以后稷配舊說星謂天田星也一曰龍左角爲天田官主穀祀用壬辰位祠之牲用太牢縣邑令長侍祠舞者用童男十六人象教田初爲芟除次耕種芸耨驅爵及獲刈春簸之形象其功也

潘眉曰六書正譌吏受賕曰臧漢書凡臧字並作臧

徵拜議郎參車騎將軍張溫軍事

注

時溫於宮門見謙謙仰曰

謙自謝朝廷豈爲公耶溫曰恭祖癡病尙未除耶

按恭祖之癡病與元龍之豪氣正可作對 何焯曰漢末爭

以下士爲賢故恭祖等得以行其意也

下邳闕宣自稱天子

又

謙退守剡

潘眉曰後漢書闕宣作閭宣誤剡字亦誤當作郟

注

憬憬夷貊賴侯以清

錢大昭曰此用詩憬彼淮夷也韓詩憬作獷薛君曰獷覺悟之貌

張楊傳單于執楊與俱去紹使將鞠義追擊於鄴南破之單于執楊至黎陽

錢大昭曰上旣云單于執楊矣下何必重複言之至黎陽上執楊二字疑衍

卓以楊爲建義將軍河南太守

錢大昭曰英雄記云楊及部曲諸將皆受催汜購募共圖布圖布者爲董卓旣誅故催汜等欲殺呂布爲卓報仇也是時催汜等用事以楊爲將軍太守必非董卓明矣

乃出兵東市又破之於犬城

後漢書郡國志云河內郡野王有射犬聚蓋卽犬城也則東

市亦當在其處

公孫度傳召度子康爲伍長

沈欽韓曰續漢志里有里魁氏有什伍里魁掌一里什主十家伍主五家

分遼東郡爲遼西中遼郡置太守

錢大昕曰晉書地理志帶方郡公孫度置本傳却不載而於東夷傳見之按本傳末有遼東帶方樂浪元菟悉平語遼東樂浪元菟皆漢故郡帶方爲樂浪屬縣東夷傳云建安中公孫康分屯有縣以南荒地爲帶方郡晉志以爲公孫度置殊誤

太和二年淵脅奪恭位明帝卽位拜淵揚烈將軍遼東太守

錢大昕曰明帝以黃初七年卽位其明年改元太和傳以明

帝卽位承太和二年之下誤也位字當是衍文

注魏畧載淵表曰

殿本考證云魏畧北宋本作魏書

注合策明之計

殿本考證云策明疑當作策名

又五部蠻夷

潘眉曰晉書匈奴傳云建安中魏武帝始分其衆爲五部其左部都尉所統可萬餘落居於太原故茲氏縣右部都尉可六千餘落居祁縣南部都尉可三千餘落居蒲子縣北部都尉可四千餘落居新興縣中部都尉可六千餘落居太陵縣

又軍旅行成

行成冊府元龜作成行

遂進軍造城下爲圍塹

太平御覽卷三百三十七引司馬彪戰畧云太尉司馬軍到襄平圍之北面東面有圍不合連車置水中積石鎮其上以鹿角塞之去城百步穿重塹監連柵安諸營立樓櫓其近水沙地不得作圍塹而車輪以大弋楮穿中又監輪障其前始度以中平六年據遼東至淵三世凡五十年而滅

史通雜說上引魚豢魏畧議云當青龍景初之際有彗星出于基而上徹是爲掃除遼東而更置也苟其如此人不能違則德教不設而淫濫首施以取族滅殆天意也

張燕傳

張燕本姓褚黃巾起燕合衆少年爲羣盜博陵張牛角亦起與燕合燕推牛角爲帥牛角死衆奉燕故改姓張燕剽捍捷速過人故軍中號曰飛燕

趙一清曰張牛角卽後漢書袁紹傳之青牛角也 或疑剽捍當作剽悍非也 潘眉曰捍與悍訓勇者異義史記貨殖傳雕捍少慮注云如雕性之捷捍卽此捍字

注九州春秋曰張角之反也黑山白波黃龍左校牛角五鹿羝根苦蠡劉石平漢大洪司隸掾城羅市雷公浮雲飛燕白爵楊鳳于毒等各起兵大者二三萬少者不減數千靈帝不能討 又典畧曰黑山黃巾諸帥本非冠蓋自相號字謂騎白馬者爲張白騎謂輕捷者爲張飛燕謂聲大者爲張雷公其饒鬚者則自稱于羝根其眼大者自稱李大目 又張璠漢紀云又有左校郭大賢左髭丈八三部也

潘眉曰九州春秋羝根典畧作于羝根范史朱雋傳作于氏根氏與羝通或稱羝或稱于羝聲有緩急如於越爲越其實

一也後漢書苦螭作苦啮大洪作大計掾城作掾哉又有白繞畦固二部而無羅市 趙一清曰平漢乃陶升也故爲內黃小史見紹傳及注又曰郭大賢疑是左校之帥故下云三部

張繡傳武威祖厲人

漢書地理志安定郡祖厲後漢書郡國志屬武威應劭曰祖音置師古曰厲音賴祖字从衣不从示

張魯傳張魯字公祺沛國豐人也祖父陵客蜀學道鵠鳴山中造作道書以惑百姓從受道者出五斗米故世號米賊陵死子衡行其道衡死魯復行之

後漢書劉焉傳公祺作公旗 水經沔水注云陵學道于蜀鶴鳴山傳業衡衡傳于魯魯至行寬惠百姓親附供道之費

米限五斗故世號五斗米道 宋濂漢天師世家敘云道陵

字輔漢建武十年生於吳之天目山暨長博習羣書中直言  
極諫科拜巴郡江州令棄官隱洛陽北邙山修煉形之術章  
帝以博士徵不赴和帝卽位召爲太傅封翼侯亦不就乃杖  
策游淮入鄱陽上龍虎山合九天神丹訪西山源獲制命五  
嶽攝召萬靈及神虎祕文於壁魯洞俄往嵩山石室得黃帝  
九鼎丹書及道旣成聞巴蜀沴氣爲人菑銳意入蜀初居陽  
平山遷鵠鳴山感元元老君屢受以經籙之法於是分形示  
化復立二十四治增以四治以應二十八宿妖厲爲之衰熄  
如發鹹泉破鬼城之事甚多不能備載永壽二年復遷渠亭  
山出三五斬邪雌雄劔二陽平治都功印一授天師衡使世  
世相傳乃乘雲上升壽蓋一百二十又三云 潘眉曰法苑



珠林破邪篇亦云沛人張陵客遊蜀土聞古老相傳昔漢高祖應二十四氣祭二十四壇遂王有天下陵遂殺牛祭祀二十四所置以土壇載以草屋稱二十四治治館之興始於此也二十三所在蜀地尹喜一所在咸陽 又天師世家云衡字靈真有長材詔徵黃門侍郎避隱居陽平山誓以忠孝導民君子謂其有繼宗開緒納俗安善之功

益州牧劉焉以魯爲督義司馬與別部司馬張修將兵擊漢中太守蘇固

水經沔水注云初平中劉焉以魯爲督義司馬住漢中斷絕閣道用遠城治因卽嶠嶺周迴五里東臨濬谷杳然百尋西北二面連峯接崖莫究其極從南爲盤道登陟二里有餘瀝水又南逕張魯治東水西山上有張天師堂于今民事之又

後漢書靈帝紀中平元年七月巴郡妖巫張脩反寇郡縣注  
引劉艾紀曰時巴郡巫人張脩療病愈者雇以五斗米號爲  
五斗米師 侯康曰華陽國志扶風蘇固爲漢中太守魯遣  
其黨張脩攻固城固人陳調素遊俠學兵法固以爲門下掾  
說固守扞禦寇之術固不能用踰墻走投南鄭趙嵩嵩將俱  
逃賊盛固遣嵩求隱避處嵩未還固又令鈴下偵賊賊得鈴  
下遂得殺固嵩痛憤仗劍直入調亦聚其賓客百餘人攻修  
戰死魯遂有漢中

注典畧曰光和中東方有張角漢中有張修臣松之謂張修應  
是張衡非典畧之失則傳寫之誤

陳景雲曰衡事見魯傳裴氏蓋據本傳言之後漢書靈帝紀  
張角張修並以中平元年反章懷注修事引漢侍中劉艾紀

與典畧之文合劉紀出典畧之前不應有誤修衡二人雖同爲五斗米道而衡匿跡深山無阻兵作亂事與叛逆之妖賊自迥異也

不如依杜灌赴朴胡

侯康曰華陽國志敘魯事有巴夷杜濩朴胡袁約三人此作杜灌與彼異武帝紀黃權傳亦作杜濩則此乃筆誤耳

魯盡將家出太祖逆拜魯鎮南將軍待以客禮封閬中侯

侯康曰華陽國志魯走巴中先主將迎之而魯功曹巴西閭圃說魯北降歸魏武贊以大事宜附託不然西結劉備以歸之魯勃然曰甯爲曹公作奴不爲劉備上客遂委質魏武武帝拜魯鎮南將軍封襄平侯

封魯五子及閭圃等皆爲列侯

潘眉曰魯五子見於本傳者一人名富襲爵爲閬中侯見於宋濂天師世家敘者一人名盛字元宗魏太祖封都亭侯弗受始自漢中還就龍虎山創三元日升壇受籙見於太平御覽五百十八引魏志者一人名廣字嗣宗魯第二子也魯雅爲魏武所寵諸子未勝纓並遣中使拜受官爵今魏志無此文又曰閭圃初封亭侯勸進表稱平樂亭侯是也黃初中進封鄉侯晉書嚴續傳稱圃封平樂鄉侯是也

注魏畧曰黃初中增圃爵邑在禮請中

殿本考證云監本作在禮謂中毛本作在禮爲中按蜀志劉封傳注詔轉儀拜樓船將軍在禮請中請猶奉朝請之請監本毛本均失之今改正

爲子彭祖娶魯女

潘眉曰彭祖燕王字字太平御覽五百十八引南鄭城碑云  
位尊上將體極人臣五子十室榮並爵均童年嬰稚抱拜王  
人命婚帝族或尙或嬪蓋謂此也 水經汚水注云黃沙水  
南女郎山上有女郎冢遠望山墳鬼鬼狀高及卽其所裁有  
墳形山上直路下出不生草木世人謂之女郎道下有女郎  
廟及擣衣石言張魯女也有小水北流入漢謂之女郎水